

**ጳውሎሲ  
ቲቶሳስ  
ፃፊ ዲታ  
ጊዶ ቆፋ**

ቲቶሲ አይዛቤቴሳፕ ሲሚ አማኖን ጌሊዳ ጳውሎሳ፥ ሚሺራቾ ቃላ አሶን ማታን ማዲዛ ኢዛስ አዳ ኤሬቲዳ ላጌ። ጳውሎሲ ሃይሳ ሃ ኪታዛ ፃፊዳይ ባፔ ላይሳን ዮጊዛኔ ኢዛራ ማቲዛ ሃይሳ ባናራ ኢሲፌ አሲዛ ቲቶሳስ ጊዲሺን ቲቶሲ ሄ ዎዴ ዎሳ ኬሳ ያሊሼ ቃርዔሴ ጌቴቲዛሶን ዴስ። ሃ ኪታይ ሎዔሲ ሚንሲዛይ ሄቩ አይፌ ዮፖታ ቦላ።

ኮይሮይ፥ ዎሳ ኬሳ ጨማቲ ሃራፔካ ቃርዔሴ አሳስ ኢታ አሶ ጊሽ ኢስታስ አይ ማላ ሎፖ አሶይ ቤሲዛኮኔ ቲቶሲ ኢስታ ታማርሳና ማላ ቲቶሳ ቆሬሴስ። ናምዓንፊ ቃስ ዎሳ ኬሳ ጊዶን ዲዛ ዱማ ዱማ ቡዱኔን ሄሲካ ጨሚዳ ማጫሳታኔ አቱማ አሳ፥ ሄሳሶካ ናቴሳ ናይታኔ አሳስ አሲ አቁዛይታ ኢዚ ታማርሳና ቤሲዛይሳ ታማርሳና ማላ ቲቶሳ ዞሬስ። ዉርሴሳን ቃስ አማኖን ዱሳ ጊሽ ሃራፔካ አሳይ ሳሮኔኔ ሲቆቴሳን ዴዓና ማላ፥ ሄሳሶካ ዎሳ ኬሳ ጊዶፌ ኢሶይ ኢሳ ኢፖኔ አሽ ባ ጋርሳን ቫኬቴስ አጋና ማላ ቲቶሳስ ዞሬ ኢሚዲ አሳና ኦጌ ቤሲዴስ።

ሃ ማፃፋይ አይኪዳ ኩሜሳ ቆፋ

ጌሎሶ 1:1-4

ዎሳ ኬሳ ካሌሲዛይታ 1:5-16

ዎሳ ኬሳን ዲዛ ዱማ ዱማ አሳታስ ኢሜቲዳ አሶ 2:1-15

ዞሬኔ ናጌታና ማላ ቆሬሶ 3:1-11

ኩሻ ቆፋ 3:12-15

ዎሳ ኬሳ ካሌሲዛይታኔ ዎርዶ አስታማሬታ

<sup>1</sup> ዎሳስ ዶሬቲዳይታ አማኖኔኔ ቱሙ አያኖን ካሌሲዛ ቱማ ኤራቴሳን ዲቻና ማላ ዎሳ አይሌኔ ዩሱስ ኪርስቶሳ ሃዋሪ ጊዲዳ ጳውሎሳፕ። <sup>2</sup> ኢዛ አማኖይኔ ኤራቴሳይ ካሴፔ አይኪዲ ዎርዶቶንታ ጎዳይ ዳሮ ዎዴፔ ካሴ ባ ኢሚዳ ሜርና ዴፖ ሂዶታ ማላ። <sup>3</sup> ኢዚ ካሴ ጊዳ ዎዴይ ጋኪዳ ማላ ኑና አሺዳ ዎሳ አዛዞን ታስ ሳባካናስ ኢሜቲዳ ሃራ ባጋራ ዎሲ ባ ቃላ ቆንጨሲዴስ።

4 ኑስ ኮሴ ጊዲዳ አማኖ ኢሲፌቴሳን አማኖን ታስ ቱሙ ና ጊዲዳ ቲቶሳስ “የሳ አዋፔኔ ኑና አሺዳ ዩሱስ ኪርስቶሳፔ ኪያቴሳኔ ሳሮቴሳ ኔስ ጊዶ” ጊዴስ። \*

**ቃርዔሴን ቲቶሳ አሶ**

5 ታ ኔና ቃርዔሴን አጊዳይ ቡሮፔ ጊጋና ቤሲዛ ዳሮ ሚሺ ዲዛይሳ ጊሽ ኔ ጊጊሳናሲኔ ታ ኔና አዛዚዳ ማላ ካታማይ ዲዛሶን ዎሳ ኬሳ ጨማታ ኔ ዶራናሳ። 6 ጨማቴሳን ዶሬታናይቲ ኢስታ ቦላ ቦሮይ ባይንዳይታ፥ ኢሲ ማቺ አዘናታ፥ ናይቲ አማኒዛይታኔ ዋይሶንታይታ ዎይኮ አዛዜቲዛ ናይታ አዋታ ጊዴቶ። 7 ዎሳ ኬሳ ጨማይ ያሳስ አሳና ሃዳራ ኤኪዳዴ ጊዲዳ ማላ ኢዛ ቦላ ዎሶይ ባይንዳዴ ጊዳናስ ቤሴስ። ሄሲካ ጨቁቲዛዴ፥ ጉሳ ሚሻን ዩሎቲዛዴ፥ ማሶቲዛዴ፥ ኡሻንቻኔ ኢዛስ ቤሶንታ አጌራ ጎዓ ጊዲዳዝ ጎዲ ኤኪ ቢዛዴ ጊዳናስ ቤሴና። 8 ሄሳፌ ቦላራ ኢዚ ኢማሳ ሞኪዛዴ፥ ሎዎ አሶ ዶሲዛዴ፥ ባርካ ባና ሃሪዛዴ፥ ሱሬ አስ፥ ዒሎኔ ኤራይስ ናጌቲዛዴ ጊዳናስ ቤሴስ። 9 ሃራ አሳታ ሎዎ ቲሚርቴን ሚንሴሲዛዴኔ ሄ ሎዎ ቲሚርቴዛ ኢዒዛይታ ሃንቃናስ ባ ታማሪዳ ማላ ቃላን ሚኒዛዴ ጊዳናስ ቤሴስ።

10 ዋይሲዛይቲኔ ዱናን ፃላላ ባሌሲዛይቲ ዳሮቲ ዴቴስ፤ ሃራፔካ ሄይቲ ቃገሬቲዳ አይሁዳ አሳታፔ አማኒዳ አሳታ ባጋታ። 11 ሄይታንታ ጮው ሂስቴሳ ቤሴስ። ጋሶይካ ኢስቲ ቤሶንታ አጌራ ባሲ ጎዓ ዴማናስ ቤሶንታ ቲሚርቴ ታማርሶን ኬሳ አሳ ዉርሲ ሞሮን ዴቴስ። 12 ኢስታ ናቤታፔ ኢሳዴይ ኢስታ ጊሽ ሃሳዩሺ “ቃርዔሴ አሳይ ኡባ ዎዴ ዎርዳንቻታ፥ ኢታ ዶዓታ፥ ጋንጃማታኔ አዛላታ” ጊዴስ። 13 ሄ ማርካቴሳይ ቱማ፤ ሄሳ ጊሽ ኔ ኢስታ ሎዔሳ ሃንቁታ። ጋሶይካ ኢስታስ ቱሙ አማኖይ ዳና ማላኔ፥ 14 አይሁዳታ ሃይሲዔ ዎይኮ ቱሙ ዮዎፔ ሃኪዳ አሳታ አዛዞ ኢስቲ ሲዮንታ ማላሳ። 15 ጌሻታስ ሚሺ ዉሪካ ጌሻ ሺን ቱናታሲኔ አሞንታይታስ ጊዲኮ ዉሪካ ቱና፥ ሃራፔካ ኢስታ ቆፋይ ዉሪካ ቱኒዴስ። 16 ኢስቲ ባና ኑ ያሴ ኤሮስ ጌቴስ ሺን ባ ሃኖቴሳን ጊዲኮ ካዴቴስ። ኢስቲ ሹኒዛይታ፥ አዛዜቶንታይታኔ ሎዎ አሶስ ቤሶንታይታ።

**2**

**ቱሙ ቲሚርቴ**

1 ኔ ጊዲኮ አሳ ቱሙ ጊዲዳዝ ታማርሳ። 2 ጨማ አሳይ ዎዝናማ፥ ቦንቼቲዳይታ፥ ባና ባርካ ሃሪዛይታ፤ አማኖኒኔ ሲቆን

\* 1:4 2ቆሮ 8:23፤ ጋላ 2:3፤ 2ዒሞ 4:10

ዳንዳያንካ ሎዎ ጊዳና ማላ ኢስታ ዞራ። 3 ሄሳሶካ ጨማ ማጫሳቲ ባ ዲዛ ዱሳን ቦንቾራ ዲዛይታኔ ሎዎ ሃኖቴስ አሳ ታማርሲዛይታ ጊዴቶ አቲን አሳ ሱንስ ኢሲዛይታ ዎይኮ ዎይኔ ጫጄ ኡሻ ሱኬን ዋዌቲዳይታ ጊዶንታ ማላ ኢስታ ታማርሳ። 4 ሄሳሶ አሲኮ ናቴላ ማጫሳቲ ባ አዚናታኔ ባ ናይታ ዶሳና ማላ ታማርሳናስ ዳንዳዮቴስ። 5 ዎሳ ቃሳይ አና አቻንካ ጫዬቶንታ ማላ ኢስቲ ባርካ ባና ሃሪዛይታኔ ጌሻታ፣ ኬላ ጊዶን ኢስታ አሶይ አይኪዳይታኔ አሳስ ኪያታ፣ ባ አዚናታስ አዛዜቲዛይታ ጊዳና ማላ ጨማ ማጫሳቲ ኢስታ ታማርሴቶ።

6 ሄሳሶካ ያላጋ አቲማሳይ ባርካ ባና ሃራና ማላ ኔ ኢስታ ዞራ። 7 አይ ሃኖንካ ኔ አሳስ ሎዎ ሌሚሶ ጊዳ። ኔ አሳ ታማርሲዛ ቲሚርቴዛ ኔካ ዎዝናፔ ታማርሲዛዴኔ ናጊዛዴ ጊዳ። 8 ኑ ጊሽ ኢታ ሃሳዬዛ አሳይ ሃሳያናስ ኢታ ዴሞንታ አጊዲ ዮላታና ማላ ኔ ሃሳዬዛ ሃሳያ ጊዶን ቦርሶ ዮዎይ ዶፖ። 9 አይሌቲ አዛንካ ባ ጎዳታስ ሃራታና ማላኔ ኡፋይሳና ማላ፤ ቃሴካ አዉቴ ዛርንታ ማላ ታማርሳ። 10 ሃኒዛዛን ኡባን ኑና አሺዳ ዎሳ ቲሚርቴይ ዶሴታና ማላ ኢስቲ ሎዎ ማርካቴስ ቤሳና ማላ ባ ጎዳታ ሚሽ ካይሶቶፔቶ።

11 አሳስ ኢዛፔ ማሮይ ቤቲዛ ዎሳ ኪያቴሲ አሳ ኡባስ ቆንጨዴስ። 12 ሄ ኪያቴሳይካ ኑኒ ናጋራን ዱሲኔ ሃ አላሜ አሞቴላ ካዲዲ ሃይሳ ሃ ዎዴዛን ኑርካ ኑና ሃሪዲኔ ዒሎቴላን ቴሙ አያና ዱስ ዳናይሳ ኑና ታማርሴስ። 13 ሄሲካ ኑስ አንጄቲዳ ሂዶታ ጊዲዳ ዎጋ ዎሳኔ ኑና አሺዳ ዮሱስ ኪርስቶሳ ቦንቾይ ቆንጫናይሳ ናጋናሳ። 14 ኢዚካ ኑና ኢታቴላፌ ዎዛናሲኔ ሎዎ አሳናስ ሚኒዛ ባ ዴሬ ኤራይስ ዶራናስ ባና ኑስ አሲ ኢሚዴስ። \*

15 ሄሳ ጊሽ ኔ ታማርሳናይቲ ሄይታንታ። ሄሳካ ኔ ኩሜላ ጎዳቴላራ ዞራኔ ሃንቃ፤ ኔና አኒካ ሌቆፎ።

### 3

#### ሎዎ አሶ

1 አሳይ ዴሬ አይሲዛይታስ ሃራታና ማላኔ ሎዎ ጊዲዳ ሚሽ ዉርሲ አሳናስ ጊጋ ጊዳና ማላ አሳ ቆፊሳ። 2 ቃሴካ አኒካ አሳ ቦላ ኢታ ሃሳዮንታ ማላኔ ሎዎ አሳ ጊዳና ማላ አሳ ኡባስ ኩሜላ ዎዝናፔ ባ አሽኬቴስ ቤሳና ማላ ኡባ ቆፊሳ። 3 ኑካ ካሴ ቆፋይ ባይንዳይታ፣ አዛዜቶንታይታ፣ ባሌቲዛይታ፣ ዱማ ዱማ አሞኒኔ ሎዎ ዱሳስ አይሌቴላን ሃራቲዛይታ። አሳራኔ ኑርካ ኑ ጋርሳንካ አዮቴሼ ኢታቴላኒኔ ሚቃይኔቴላን ዶስ። 4-5 ጊዶ

\* 2:14 ማዛ 130:8፤ ኬላ 19:5፤ ዛሬ 4:20፤ 7:6፤ 14:2፤ 1ጴፅ 2:9

አቲን ኑና አሺዳ ሶሳ ኪያቴሲኔ ኢዛ ሲቆይ ቆንጨዳ ዎዴ ኑ አሲዳ ሂሎቴሳን ጊዶንታ ዲሺን ኢዛ ማሮቴሳ ዳሮን አቲዶስ፥ ኢዚ ኑና አሺዳይ ናምዓንሶ ዩሌቴሳ ጊዲዳ ሜቻኒኔ ሂሎ አያናን አራዳቴሳና፥ <sup>6</sup> ሄሳካ ሂሎ አያናይ ኑ ቦላ ኑ ጎዳ ሶሲ ኑና አሺዳ ዩሱስ ኪርስቶሳ ባጋራ ዳርሲ ጉሲዴስ፥ <sup>7</sup> ሄሲካ ኑ ኢዛ ኪያቴሳን ሂሊዲ ሜርና ዴዎ ሂዶታ አይኪዲ ላቲዛይታ ጊዳናሳ፥ <sup>8</sup> ሄሲካ አማኔቲዳ ቃላ፥ ሶሳ አማኒዛይቲ ሎዎ አሶስ ባና አሲ ኢማና ማላ ሃይሳ ጩርሳ ኔ ሎዔሳ ዮታና ማላ ታ ኮያይስ፥ ሄሲካ ሎዎኔ አይ አሲካ ኮዩዛዛ፥ <sup>9</sup> ቃሴካ ጮ ሃዳ ፓላማፔኔ አሳይ ባ ቆሞ ቆዲዛዘፔ፥ ማርሼፌኔ ዎጋ ጊሽ ዴንዲዛ አሻፌ ኔ ሃካ፥ ሄይታንቲ ጎዎይ ባይንዳ ፓሶንታ ዮዎ፥ <sup>10</sup> አሳ ጊዶን ሻኮቴሳ ሜዲዛ አስ ኢሲቶ ናምዑቶ ኔ ዞሪን ኤኮንታ ኢዲኮ ኢዛዴራ ኔስ ኢሲፌቴሲ ዶፖ፥ <sup>11</sup> ሄሳ ማላ አሲ ባሌቲዳ ናጋራንቻ አሳ፤ ኢዛዴይ ባርካ ባ ቦላ ፒርዲዳይሳ ኔ ኤራ፥

**ዉርሴሳ ዞሪ**

<sup>12</sup> አርዲሞኔ ዎይኮ ቲቂቆሳ ታ ኔኮ ኪቲኮ ኔ ታኮ ኒቆጶሊዮኔ ያናስ ኔስ ዳንዳዩቲዛዚ ዉርሳ አሳ፥ ታኒ ሃላይሳ ባልጎ ሄን አሳና ጋዳ ቃቻዲስ፥ \* <sup>13</sup> ዎጋ ኤሪዛ ዜማሲኔ አጲሎሲ ቢሺን ኢስታስ ኮሺዛዝ ዉርሳ ኩንሳ ማዳ፥ \* <sup>14</sup> ኑ ባጋታስ ሃቺስ ሃቺስ ኢስታ ኮሺዛዝ ኢስቲ ዴማና ማላኔ ኢስታ ዴሳይ ጎዓይ ባይንዳዚ ጊዶንታ ማላ ኢስቲ ሎዎ አሶ አሲ ሚናና ማላ ታማራናስ ኮሺስ፥

<sup>15</sup> ታናራ ዲዛይቲ ኢንቴና ሳሮ ጌቴስ፥ አማኖ ጌዶን ኑና ሲቂዛይታ ዉርሲ ሳሮ ጌቴ፥ ሶሳ ኪያቴሲ ኢንቴናራ ጊዶ፥

---

\* 3:12 ሃዎ 20:4፤ ኤፌ 6:21-22፤ ቆላ 4:7-8፤ 2ዲሞ 4:12 \* 3:13 ሃዎ 18:24፤ 1ቆሮ 16:12

## አራሳ ጫቆ ማገፋ ጋሞላ

### New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 22 Sep 2022 from source files  
dated 29 Jan 2022  
dffa0cbb-5f77-5875-bf95-f4176677af45